

JIUD

Jiudon Vuak Amur

E uruvana bu vierafe e Jiud e iji fas igi isoainma iji fu Jesuon diar ijar fas igi isoain (Mak 6:3). Fu Godri sanainma fuon iija no karaunuinma ijefuon isoikafa vierafen revo fu fai e iji vuak kufui nijaidiaoijo ijieb e iji ma vierafejo iji unam kufui buon iji nijaidiava fu fain. Ijefuon fu fas igi isoime e iji ma vierafejo iji kuardiame kia, E iji vuak kufui nijaidiavo iji bu Jesuon vuak ma iji nijaidiavo bano kiain.

Jiudon vuak kafokafo fu isoainma ijin

1:1-2 Jiud fu bu anadiainma ijin.

1:3-16 Fu e iji vuak kufui mene nijaidiavo iji bu izeg rad vajai fian abekfuon ijin.

1:17-23 E God ma vierafejo iji bu ma vierafejo buon iji ke biom mamkanuk rekfuon ijin.

1:24-25 God ko Jesu Kurais arordiavo ijin.

¹Fas igi e Jiud Jeimson uvaij ga Jesu Kuraison ikreno nar isoain. Nar isoime e iji ja Godri kenma ja efuon renva ijin nijiav. Regavo e iji ja God Asoinuvuon ijar oijmiamo ga Jesur samuagdiam. ²Regavo na sirimamega God fu tavan bog jon oifian abene ma rediaknum ifejdiaga ja afuime oijmanamiknum kariockfuon.

Izeg God fu e iji vuak kufui nijaidiavo iji kam vajai fian vajiakfuon ijin

³Efnun na nuvuon no Jesu Kurais fu no karaunuinma iji no fateroin abenva ijefuon vuak iji anerene isoim nijiakafie vierafen revo iviakma na una vuak be iji isoim nijiav. Vuak iji na soisoime kuardiaga ja griesame unam iji no God ma vierafejo iji God fu efuon iji vajainma ijia griesame biduame karivak. Revo God fu vierafega vuak ijar magame fu abe e fok no muido no vuak ijesugin mukorigia samuakfuon. ⁴E kafo God ba ma vierafejo iji bu isuar sauime e iji ja afuime karinva ijia biedareme karikuai vuain. Bu Godon vuak ma iji fu izeg e fok oijmiaknum ise buon giame aremo iji bun dab dakaroime vierafen. Bu kuai unam fudainamiknum unam isema reoijo iji God fuba no kege vajai fian

vajuokno kuaiv. Regavo bu Jesu Kurais E Bomana nuvuon fu fuonkua no samuagduomo iji bu uzame ba abega fu oibuon ijia fin. Regavo usuibe e iji Godon vuak viera fene kuaimojo ijieb e iji isema reoijo iji God fu bu kege arafiriakfuon ijiebuon vuak iji bun buk akaj ijia isoin.

⁵Regavo vuak iji jan viera fene revo na una ja nijaidiaga ja viera fene. E Bomana iji fu efuon Isrerk iji Ijift ijia karaunia inma iji viera fene. Fu karaunia inma revo rad e iji buba fu ma viera fene iji fu kam arafiriak. ⁶Regavo madu ni anera iji viera fene. Buk bu daro iji God fu miainma bu una Godon daro iji asikuai viera fene. Ijefuon God fun bu kege sen iji fuba turasekfuon ijia abe kirame ar nakinma ijia uniaido fu tavan radkma ijia kege arafiriak. ⁷Regavo ni madu mai Sodom ga Gomora ga mai ukakna kafo samaj iji bu izegrenva iji viera fene. E iji bu anera iji bu renva ijeg bu ba God igain revo bu barubara buon fudanamiknum ka unam ma ise iji ren. Bu iji renva ijefuon mai iji bu vajai fian abene mian ijia naoin. Regavo e fok bu ijia giame viera fene bu iserekva bu ijeg arafiriame mian naoikro bu ijeg viera fene.

⁸Regavo e iji sauime jon vuainva iji bu vuak iji bun viera fene. Revo bu koikbuon naka naoime una unam ise iji rene bu fudainamiknum koikbuon vajai buon kam arafiriav. Bu ijegrene Godon daro ma iji uzame una vuak ise kafo Godon anera ijiebuon kuaiv. ⁹Anera vuamakin Maiker fuba ijeg ren. Erar Mosison vajat surif iji abekfuon iji fuba kaven ise Setank musikuai me vuak ise kafo fuon kuain. Regavo fum Setan kuai, Godri a abe arafirakno kuain.

¹⁰Regavo e iji bu vuak kafo buba mukorigia faime viera fene iji bum vuak ise kafo ijefuon kuain. Regavo unam buon bu rejo iji bu ire fanuf buba viera fene ijeg reoijo. Ijefuon unam iji bu rejo ijar vajai buon kam arafiriak. ¹¹Bu esenia! Bu unam ise ijia rene e Kein fu vainma ijia ja vain. Bu mon viera fene bu koikbuon uri e Beram (e iji fu Godon vuak uzame mon abekafa bomana viera fene ma ijin) fu unam ise fu renma iji jame ren. Regavo madu bu uri Kora fu renma ijeg Godna bijain ijefuon God fu bu kege Kora fu arafirinma ijeg arafiriain. ¹²Regavo ja Godon ar ijia besum afuime oijimanamime duok ijo ijia bu jana duok ijo iji buka unam ise kafokafo iji rejo ijefuon jaka jufdiav. Regavo bu duok uruvana iknum buonkua buon viera fene. Buka ire vana iji buibur ijar abe vak revo tavan iji fu damo bakin ijekin. Regavo madu buka in iji fu a kaname ba tavan fuon ma ijia una kiramo gavo fum sairmo ijekin. ¹³Bu ise buon iji buka ire do iji fu firame kafut ga do tatan iji fu irif ijia areme vako ijekin. Regavo bu ire mujur iji buba ar besum irev gavo bum ijia oijo ijekin. Regavo e ijekin iji bun Godri ar iji ka ma nakinma e iji bu tavan bog ijia karivakfuon iji buifuon amaren.

¹⁴Regavo vuak ijiebuon iji fun e iji uinre ruainva ijia Adamon sat be e Inok kuavo ijar amur buisina kuain. Regavo Inok fu ijeg kuai, Ni

gaf! E Bomana iji fu anera fuon akai ka ma uruvana iji aferdia buna rokno kuain. ¹⁵Fu aferdia e fok kege ise buon iji mazim giakafa rok. Fu e iji bu Godon e ani rene unam ise God ba oimaikfuon bu rejo iji kege arafiriakafa rok. Regavo madu bu vuak kuriaikuriaikin bu Godsina kuaivo iji kam arafiriakafa bu iji rok.

¹⁶E iji buka vuak kam e kafo namdiaknum zie vuak iji tavan bog kuaiv. Regavo buka aroikaraknum unam ise buon bu vierafenza iji jajia. Regavo tavan iji bu e kafobuon vuak ma iji bu kuaivo iji bum ire kafo ijia biesia soisoime nimdia kuaiga bu ire vajiaiknum buifuon ire kafo rej.

Vuak nijaidiame ujurdiaga bu ijia jame karikfuon ijin

¹⁷Regavo kaifnun vuak iji e afasor E Bomana Jesu Kuraison ikreijo bu kuardiainvia iji mukorigia vierafe. ¹⁸Bu kuardiame kia, Tavan radkma iji ruakma ijia e bu ro unam jon ga God jon iji kam varaimene kijdiakfuon. Regavo bu unam buon bu vierafenza ijesugin rejknun unam iji God ba oimaikfuon iji rek. ¹⁹E iji buka Godon Kaven ba abenva ijin. Bur e kege atame kafokafo uniaknum unam iji bu vajai buon bu oimardiakfuon bu reoijo e ijieb ijeg reoij. ²⁰Regavo kaifnun jab unam ijeg rek. Regavo ni giriesame ifenamiga jon ja ma vierafejo iji fu ofriak. Regavo Godon Kaven Akai ijefuon daro ijia sirimameof. ²¹Jon ja nakikmazak kegoijo iji jika Godon ojmiamo iji abe joi nijainamif. Ja ijegrejknun karioga Jesu Kurais fu una roko ijia fu fuon mardiamo ijia unam iji tavan bog ijia karivako ijin vajiak.

²²E iji bu God ma vierafekuai nuanamime rubdiavo iji buon oifian abene ojmiamnum ifejdiaga bu una darokma God ma vierafer. ²³Regavo e iji roin bu Godri kam arafiriaga bu mian naoikrejo ijin ojmiamne ifejdia kuniai turame una unam ma ijia uniaf. Revo unam ise iji bu e iji tomdiainma iji mukorigia nuigafiame e iji ojmiamne karauniaf. Regavo ni mukorigia samuanamigavo jab zazaime ise ijefkin iji kafo reok.

Sirimamene Godon oimarvo ijia

²⁴God e iji fu no karaunuinma ijefuon fuon oimaref. Fur ja mukorigia samuagdiaga jaba jon ja ma vierafejo ijia zazaime ari kaniak. Regavo fur aferdiaga ja ise kafo bakin ja maturaime oimarknum ar fuon sanainma fu tavan bog daro fuon ijia samuame fivakfuon ijia karik. ²⁵God fuonkua fu God ma ga fur Jesu Kuraison duadok ijia no karaunuin. Ijefuon roga no God ijin aroiknum oimardaf. No vierafe sanainma ijiga daro bomana ijiga daro iji fu ijia ire fok samuagdiamo iji bu ik anej ijia ga iviakma ga tavan rad bu fuon rekfuon. Mare!